

四庫全書

集部

欽定四庫全書

集部

松桂堂全集卷四十二

詳校官庶吉士

臣汪彥博

助教

臣常循覆勘

總校官如縣

臣楊懋珩

校對官助教

臣李學錦

謄錄監生

臣邵樹德

欽定四庫全書

松桂堂全集卷四十二

吏部侍郎彭孫通撰

南淮集二

水亭步月

雨餘林氣浮散步水亭前山月遲方吐幽人晚未眠疎
燈映竹戶清露濕茶煙羣籟一時息秋河正悄然

與番禺兄乞米

落盡青菰野飯香
行人猶自滯江鄉
飛牋問取神仙宰
乞與當年煮石方

濫食久應慙北郭
長饑耐可學東方
不須遠就謝仁祖
分取桃花十斛香

贈胡豹生先輩

天涯蹤跡久飄蓬
十載青雲客夢中
風節人間窮益見
文章嶺外老彌工
客吟已自深莊鳥
蠻語何妨傲郝隆
歸計明年須及早
不教辛苦望征鴻

題張山人畫冊

數聲相向最高枝涼雨新秋欲暝時
吸露餐風君莫訝
由來清亦畏人知

樹色雲容縹緲間寒潭秋水碧潺湲
江亭高枕清無事
飽看襄陽雨後山

黃金新埒玉為鞭一騁霜蹄旋旋圓
持比前朝諸畫客
風流何讓李龍眠

初入粵食蠓幾至委頓東林秀才

偃鼠何須設大烹巨蠔幾欲困吾生應緣誤讀鍾岢議
遮莫空耽爾雅名

冬夜過退菴兄春雨堂中飲

官燭生烟夜欲殘四垂黼帳畫堂寬移樽墮珥人如玉
入座同心臭似蘭砌竹琤泓將雨至瓶梅清冷著花難
醉來數問今何夕不道鄉愁逼歲闌

清樽官閣有前期選勝追歡屬此時千里關河鴻雁侶
百年風雨脊令詩錦茵垂手呈能巧紅袖分枰布算奇

康樂西堂應不減
往還幽興亦相宜

粵中除夕

南中逢此夕
酒罷轉淒其
不寐憎衾枕
多愁歷歲時
帷燈搖夜色
隣樹引朝曦
已覺鄉心切
春風莫漫吹

人日

山城春事近
何如高枕南
窓但索居
莫訝知交相
問少從來深
巷有迴車

寄尹孝廉考功兄弟

秋日東官道名園作寓公山堂經月住清興數人同落
子楸枰冷開樽荔酒紅夜闌猶刻燭高詠答松風

秋色江村遠終朝載酒過疏簾當晝捲好句入秋多葉
子清宵戲珠娘靜夜歌佇看林際月寒影落纖蘿

郊扉耽野趣水郭帶斜陽愛試青絲鞵貪眠白玉牀雪
杭蒸藕葉銀粉進檳榔風物今能憶茲遊極不忘

江清曾共涉樓迴每同登待月中秋宴彈碁半夜燈時
時過北曲數數問南能是處多同調離情可自勝

青桂山牕下紅蘭水檻前藏鈎三五夜沽酒十千錢比
玉身多愧兼金意已堅別來方幾日約畧似經年

此別知非久相看亦黯然銀燈搖綺席清醑汎離筵鴻
雁天涯侶秋風渡口船拏舟一相送江月靜娟娟

元夕遣家問

魚書千里赴回潮一幅烏絲寫寂寥紙尾分明題月日
可憐今夕是元宵

春日遊海幢寺呈無公

春江亂野渡一舸如杯輕閒身曉投寺遠見雙幢旌寺
門對江水水靜綠始生風吹木棉樹紛紛墜紅英無公
知客至莞爾相將迎豈無酬對煩彌覺心境清烟竹深
自留雲松長與平坐久不能去乘潮聊復行

送謝副使之瓊州託訊舊感恩令金劍耿消息
瓊海先秋汎珠崖問俗時黎人瞻鹵簿漢郡見威儀故
舊閑居久清貧大吏知拂衣今十載何事緩歸期

素馨花

雨餘氣息帶清酣
雪滿花田藥半含
一種幽香矜秘甚
不教移植到江南

細藥繁枝徧作花
濃香隱隱浸秋紗
月明夜靜微聞得
風味依然似鬢華

越臺高

越臺高高磊磊挾江閩
馳嶺海石闕雙聳雲棟孤擎利
在威遠安用虛名寶劒出匣虹飛電落庾桂為鐔儋珠
為鍰陸擊鳬雁水割溪毛敵愾未奏不如鉛刀犀渠臥

雨弧矢在房壯士徒搏千夫莫當何不揮斥乎上下為
天子兮守四方

海颶風

海颶風振山谷蕩我田禾摧我屋黃茅白葦百萬家夜
雨啾啾聞鬼哭風伯莫怨嗔海若何不仁安得精衛填
此津五山相屬皆揚塵長鯨北徙白浪開復爾邦族爾
莫哀牽縑拾月削蜃灰漉波煮水霜皚皚颶風之後春
風來

豎奴陳德隨予之嶺外客死念其二十年勤舊
因有此作

迢遙南越行跋涉高涼使我僕亦已痛奄然即長寐昔
我未第時一心相隨侍辛勤二十年樸誠終無貳客死
亮可哀追思有餘喟匪直惟蓋恩豈曰泥塗棄招此南
方魂遂爾首邱志

荔支行

南中嘉樹好顏色物產時時凌上國丹華紫纈何陸離

踏遍村南與村北中有仙人十八娘紅雲覆體紅綃裳
水晶膚骨玉脂凝天然風味誰相當尚書園中名第一
黑葉金鐘亦迥出佳種由來最晚熟六月衝炎始摘實
細枝入手暍氣通春泉忽漱元膺宮芳甘柔滑不留齒
冰雪立化香融融黃柑霜柚甘一唾盧橘楊梅俱下風
越人日嗽過三百欲以清腴傲吳客標題不肯讓閩川
圖譜猶能爭品格此物寧堪走傳車天南民力未全舒
只今萬里却貢使何必唐羌更上書

寄沈嘉令

十里羅湖攬勝遊
蘇公遺蹟見風流
秋來遠憶狂司馬
明月題詩滿郡樓

送記汝上人之廬山棲賢寺

金井橋頭竹樹春
玉淵潭上水清潄
潄陽舊隱多棲託
此去山中見幾人

入光孝寺小憇菩提樹下寺即六祖為印宗演
法處

客久轉多暇古院聊招尋院中無一士日落珠殿陰千
年石塔迴百步迴廊深山鳥不避客翩然下高林小憇
西方樹時開北風襟長松發遠籟泠泠有餘音

送趙少叅歸養

軒車辭越嶠舟楫下膠河此去親闈近年來吏隱多青
山歸舊業朱萼長新柯却視千鍾祿真同鶴雀過

答澹公見留遊丹霞山之作

荷香荔熟正佳辰鷹爪花前坐晚春邊海潮生清磬答

隔江雨過夕陽新
名山久擬追禽慶
上行何時託庾詵
便欲從公方外老
螺墩錦石一閒人

簡王說作

春江十日雨門館
晝不開爾居城西
地最下病中枕席
生青苔天寒鶴骨
應更瘦猶有清吟
日幾迴

陳白沙草書歌

白沙先生名早聞
手擲青山歸白雲
陳情上擬李令伯
講學欲方吳聘君
晚年信手作大字
茅筆縱橫有奇致

何必規規王右軍淋漓時復成高寄世人好古如好龍
可憐識見多雷同豈知草聖固餘技相賞不在翰墨中

觀射

嚴城吳絕塞廣野漢遺宮
亂燒驅秋草新寒燥角弓
釋弮平似水穿札迅如風
巧寓垂楊外心棲畫鷁中
弦虛能下鳥塵靜不驚蓬
迂濶羞儒效經營重武功
陽元才不逮真自鄙雕蟲

送李漁入盧尚書幕

一醉芳筵月亭亭送客過新詞留價重白首好游多去
傍蓮花幕歸聽桃葉歌自今清讌日誰與樂婆娑

與客圍碁賭荔子戲有此作

清簟拋書午夢短二屨初來叩空館相將移席就蕉陰
蕉影頻移子聲緩須臾歛局罷相持紺房仙實紛離離
君看此手欲何作太守不如噉荔樂

寄白門余處士懷

移家初駐木蘭橈桃葉江邊第幾橋知在青溪芳草外

殘陽細雨弔南朝

珠江秋汎

出郭窮秋望，攜壺溯晚晴。但隨潮水去，何必問期程。

西洋琥珀酒船歌

海外良工擅竒思，酒船制作窮珍異。滑稽足傲鷗夷形，淋漓可使淳于醉。宛轉玲瓏二尺長，鏤金錯采巧莫當。丈珠作牕玳瑁屋，白銀為席珊瑚檣。酌酒五升帆半起，峽船始發春江裏。引壺注滿飽欲張，蓬蓬已可行千里。

長年三老毛髮動鬚眉
颯颯笑相視綺疏啓處
中有人皎若芙蓉照秋水
須臾酒竭帆亦收回看
堂上唯虛舟機緘動止
那可測見者疑同神鬼
遊此器徒聞出西域估
客新從舶中得由來奇
巧蕩人心不脛還能走
中國對之三歎謝賈胡
匏樽一酌足自娛居奇
漫值十家產適用豈若
千金壺投珠抵璧當代
事雕鏤無益何為乎

題海珠寺

水中樓閣出虛無
兩岸烟波入畫圖
來往帆檣歸客少

興亡亭榭夕陽孤
鮫人聽法秋揮淚
龍女棲禪夜施珠
物外莫論塵世事
越王臺上有啼烏

送陸谷遊羅浮山

西風吹江流送子上渡頭
干謁不得意且為林澤遊
十載無家長蔬食蕭然遠絕形骸累
此行好住羅浮山慎勿回
感恩人間葛仙亭下訪遺履
應有真人夜往還

題程氏水樓

舊館重來倍寂寥
隔溪惟見柳千條
黃花水榭無人到

獨對西風看落潮

瀧水吟送人至海康

朔吹搖征衣寒日瘦平楚君無渡瀧水瀧水深且阻瀧
頭西望更無極岩嶂叅差行不得林菁幽密虎豹啼過
客相看少人色謫宦天南幾箇回薄遊何意此中來
公閣下倚孤劒海水天風日夜哀

與無公約遊雷峰寺

雷峰塵外境高舉謝人羣山色隨時好溪聲盡日聞天

花秋自落嵐翠晝平分野鶴能相待將予共白雲

送蕭星源歸龍江

送子龍江道殘冬欲盡時竊金終自白投杼亦何私俗
薄交知少家寒仕宦遲藜羹歸莫厭勗爾九霄期

嶺南竹枝詞

木棉花上鷓鴣啼木棉花下牽郎衣欲行未行不忍別
落紅沒盡郎馬蹄

春草青青秋草黃桂花開後菊花香郎行莫過新州去

獨鶴西頭是瘴鄉

嶺南有青草黃茅桂花菊花
諸瘴見高涼郡志獨鶴地名

妾家溪口小迴塘
茆屋藤扉螭粉牆
記取榕陰最深處
閒時來過喫檳榔

蒟葉闌干石粉新
研光盒子色如銀
何須貰酒能留客
一口檳榔醉殺人

林中莫種芭蕉樹
空自青蔥滿舊叢
蕉子鮮甜難得飽
蕉衣紕縵不禁風

半年水宿半山居
冬採香根夏採珠
珠好須從蚌中覓

香燒還仗博山爐

高髻編金耳飾璫生來嬌小號珠娘朝朝出汲春江口

不著鴟頭足似霜

二十年來水戲張蒼龍百尺舞牙樯阿家笑拍雙鬟語

記得前遊爾許長

越江五日龍舟競渡相傳有神司之每二十年請于神乃克一舉極極觀

聽之樂詳見今
釋大洲龍舟記

茉莉攢燈射玉除素馨簇帶影扶疎持燈照見好顏色

顏色雖如香不如

月明歌女摸魚聲風靜蠻童駛舌鳴
鬼子驛中乘傳過
蚤人江上弄潮行

嶺外早秋送友人先歸檣李

秋風引鄉思一夕腸九迴相送意轉深
悌鬱何由開懷
中延露曲音節有餘哀願因商飈發吹上古琴臺

立秋前一日曉發龍川道中望霍山

山以秦人霍龍得名

有石甕泉珠乳巖諸仙蹟

江村雨後早涼生小騎輕輿次第行
殘月初分千樹曉

宿雲不斷衆峯平山空已杳秦人跡城遠猶留趙尉名
欲向林中浣餘暑甕泉珠乳汲深清

長樂官舍立秋

細雨平林晚未收東來路盡古循州山城車馬初投館
嶺徼風烟又入秋地濕似懷湘客恨氣暄仍有瘴鄉憂
憑高一送登臨目何必蕭辰始欲愁

張都尉畫馬歌

汗血不世出但聞西極來披圖忽見渥洼產簡雲逐電

相縈迴立者驤首欲一鳴障泥未解猶徘徊走者勢如
風雨至馳驟萬里無纖埃其餘數匹飲或齧一一神駿
非凡材問誰擅此化工技逸足天閑妙無比只今都尉
最得名不讓當年韓與李都尉生平本將家前朝曾領
上輕車身親百戰竟何益白頭歸種東陵瓜早歲壯懷
時吐露伏櫪雄心見豪素平沙漠漠落日黃馬首猶然
蓄餘怒嗚呼黃金之臺高突兀冀北之良恣起忽龍媒
當世豈合無昭王已往九方沒唯看阪上服鹽車誰向

圖中求駿骨

送姜山上人歸東莞山中

方外棲遲久山中獨往深孤雲同此意來去亦無心

梅州寄洪暉吉

梅州郭外驛程孤八月江行暑未蘇地接蠻雲頻溽濕
天連瘴水更縈紆土風已自徵瀧吏物產唯堪薦荔奴
知爾關山多失意秋來能不憶蓴鱸

潮州食新龍眼

炎風吹人遍林谷荔枝摘罷摘龍目一摘再摘味漸好
三摘四摘果全熟南山北山千萬樹纍纍枝頭幾百斛
剖房忽見驪珠明脫手疑同金彈逐少焉一齧甘如飴
玉液瓊膏盈口腹仙漿沁齒流絳宮頓覺泠泠息煩燠
閩潮之間種最佳大如雀卵厚肌肉日盡數升飽欲死
已可忘饑辟五穀何妨久食駐紅顏猶勝長鑱采黃獨

食江瑶柱偶題

平生耳熟江瑶傳十載空尋江海遊朝來忽動子公指

添丁馬類紛見投充庖已覺南京異入口俄驚玉柱柔
風味僅能同蚌蛤鮮腴還似讓蝸蟬大蘇好事乃不惡
錫爾嘉名真善謔龐然曾說黔之驢氈毼爭笑羊公鶴
此物由來天下多江瑤江瑤爾何忤

七夕與賀伯醇盛周萬對酌

蕉子花邊夜結星江聲月色滿中庭樽前幸有三人

客裏休教一日醒

潮陽人七夕陳
瓜果名為結星

寓潮日值先子忌辰揮淚有述

獨客關河阻孤兒涕淚懸含悲過此日銜恤在終天萬
里違邱壠三秋隔几筵眼枯桑浦上心死鳳山前縱得
邀三釜誰能起九泉徒留弓冶澤空廢蓼莪篇已抱臯
魚恨遙遙二十年

韓山謁文公祠

山因文公得名有古木
參天土人呼為韓木

韓山鬱以特韓木何蒼蒼乃有韓公祠氣色參相望我
來拜祠下拜罷重登堂披帷覲公像儼若在我傍身黜
名愈顯事久澤不忘風流千百世被此蠻蜚鄉烈士殉

節義達人重文章寄託苟有在貶竄其何傷

七哀詩

有小序

寓居嶺表離索無徒唯故人尹二右民相得
甚歡屢跡書筒往還幾無虛日不圖今夏遂
為異物因念海內朋舊比年以來日就淪喪
感南皮之會者殆不止抱痛于元瑜也爰追
述生平作詩七首亦猶士衡歎逝之情哀可

知矣

華侍讀亦祥

侍讀負異才金門譽早振時名馳禁闈物望齊君俊風
儀挺朗秀玉德含清潤默擬河東書性同溫室慎薊邱
昔投契夙好逾韶齒石交多素心蘭言結芳信中更六
七載朝露驚何迅遠慚白馬約永絕青雲訊揮涕滿梁
谿滂沱霑素紉

許給事瑋

給事恭靖孫淵源富家學夙悟有神啓十行目俱落探

理見四本讀書窮八索傲性謝交遊孤蹤恥依託惟予
與夫子交情久彌恪淒涼蕭寺居寂寞寒江泊聯床話
永夕高詠酬孤酌深言戒美疾虛中納良藥遊處跡畧
同往還義非薄一旦分鑣去心期宛如昨朝鳳慘不鳴
童烏杳難作靈輶返葛山歸骨填哀壑長歎叩蒼穹天
心一何虐

徐孝廉鑛

次璆饒逸藻弱冠攀仙桂家貧好遠遊恥為生產計襟

情披秀豁神宇散開霽李路無宿言柳惲有餘藝曩者
定交時少長年相繼皎皎青松心泠泠白水誓聞自七
閩歸手劒賈餘銳既有北門嗟復落南宮第百憂能傷
人征途遽長逝高堂尚白頭稚子始總髻誰分邱成宅
一雪西華涕

金編修國用

編修富春秋英英金玉器秉質既溫縝吐詞亦清利桃
谿得蔭佳藜閣窺書祕民雋爾何慚弟畜吾多媿猶憶

欽定四庫全書

松桂堂全集
卷四十二

六

吳門遊雞黍見交誼屬有茂陵憂兼之遷謫意杳杳鳳
凰池漠漠山邱閔一朝骨肉親秦越紛相視朔風生沍
寒孟門多顛躓指顧變暄涼須臾分險易世路誠可嗟
褰裳孰能避

鄭侍御為光

侍御人中豪意氣凌八極身名兩俱泰才地迴難即服
官僅朞月慷慨思盡職蒿目上封事矢志除蝨賊寬爾
桑梓憂紓此東南力夙昔廣陵江送子遊京國攬轡志

澄清立朝戒容默虛懷受盡言不病狂與直大節鬱未
伸沉疴亦已亟歎息此人往西臺黯無色

蔣庶常繪

庶常性通敏風神皎冰雪才情紛若雲譚諧粲如屑彩
筆春葩鮮清文秋露潔長安謝病歸杜門掃車軌玉樹
忽沈埋榮華同一規總帷曾入臨惻惻清明節軒庭翳
網絲苔蘚侵行轍賈傳年不永羊生眉終絕佇立笛聲
中臨風轉嗚咽

欽定四庫全書

松桂堂全集
卷四十二

十九

尹孝廉治進

右民孝友士至性非由學內行本淳深奇材恥羈絡結
客盡黃金觀書厭糟粕名高走江嶺交盛馳京洛斯人
曾閱傳誰云布絲諾傾蓋廣川臺除館東宮郭久敬人
所難古道洵無忤張毅鞭不前中行痺初作悠悠參里
山千載長幽壑驢鳴意莫酬蕙歎情奚託拊歌桑戶琴
庶以平哀樂

閱潮州郡志見潮陽女子謝五娘詩小軒睡起

日將午黃葉滿庭山雨來歎其絕佳因有此賦
散帙南軒午夢餘劇憐詩思艷芙蕖江雲暝合斜陽外
秋樹涼生欲雨初詠雪才清人宛在然脂事往獨愁予
擬持好句題團扇木葉亭臯總不如

韓山亭

嵐氣凌高秋岡勢日崙萃欲問山中亭蹟與寒烟沒藤
稍冒客衣屐齒粘苔髮下山不見人海水搖明月

潮州西郭

潮州西郭水茫茫林氣瀰漫海氣黃沙尾依人憐越鳥
波心擊汰憶吳航寺樓漁艇全經眼斜日疎烟合斷腸
陳堯佐潮州西湖詩疎烟漁艇遠斜日寺樓閑欲去更留餘戀在韓山片石渺
相望

蔡家園

土城裁廣里所據特爽塏完保夙藉茲百室猶然在壤
薄禾黍稀氣肅川原改壘勢走揭饒潮聲逼江海此地
方在郊惜哉尚多壘民牧今為誰遺言冀可採

程江寄宋尚木

一折三江柳離憂五載多登臨懷舊賦襦袴聽新歌漲
海峰初息深秋瘴已和空迴千里駕悵悵隔山河

產溪夜月懷程五周量

晚渡初潮滿西風一榜輕烟波隨地好燈火隔林生客
有將歸思秋多欲暮聲薊門今夜月應似產溪明

含笑花

春叢初挹露曉色欲升霞借問忘憂草何如含笑花

潘田驛中見木芙蓉一本高丈餘

一枝獨自染秋容
拂瓦窺檐曉露濃
惆悵佳期不可即
空教木末採芙蓉

渡畬坑

羣山浮爽氣
夕吹漸清和
夜雨溪行遠
秋畬火種多
去帆沿水急
歸騎亂流過
逆旅知何託
新蟾已挂河

由潘田而西涉畬坑至通判府行萬山中綿亘
百餘里

今晨幸清霽，倣駕將言還。舍舟一遵陸，藍輿輕且便。揭
水見凌亂，陟峯絕黃緣。相逐互高下，登厯窮山川。秋杪
崖氣肅，山空人語傳。寒花冒幽澗，當風扇芳鮮。朅來百
餘里，所遇無人烟。流亡久不返，道傍惟石田。舊府留重
鎮，落日森戈鋌。揚越此南徼，設險非徒然。旅行誰不戒，
獲此託高賢。

蓬辣灘

蓬辣灘前一水長，驚濤如雪斷人腸。越臺西望猶千里，

何處雲山是故鄉

還至雷鄉館中雨憩

昔往始徂暑今來已暮秋驅車逝將返零雨濕我輶舊
館再一宿登此亭上樓娑羅子初落黃菊花已稠時物
一以謝河山邈且修悵然發長歎四顧增離愁

渡赤甲水登尹家園眺賞沿溪入村落數里石
橋流水竹樹可憇

佳遊不厭近乘興即長往翳翳竹樹陰悠然發遐想涉

江踐夙約登園挹秋爽下尋村徑幽遠逐溪流響榕梢
隱人碧蘭苗隨地長樵牧起墟烟禾稼被田壤樂此間
井淳風物況豐穰及今秋正妍盤礴窮心賞

與蘧非爾任叔吾漆思諸子同遊金繩菴觀舍
利

宿雨過林垌秋光染苔竹精廬同一遊良因忻寓目香
積有餘施迥然飽蟬腹楊枝漱寒齒花艷承新沐坐愛
松風鳴茶鐺亦已熟

夜宿邠上人山寮寒甚乞卧具

已阻山中雨還就山中眠風淒感凜秋鑪寒無宿烟堂
中高行士趺坐方晏然暫乞蓮花服終依烏道禪

聞訥菴終養得請遙有此寄

金馬門中久陸沈蓬萊闕下暫抽簪重裊不少吾邱恨
陟屺應懸季子心釣水烟生湖外艇采蘭春上玉山岑
自傷風樹情難逮欲寄新詩淚滿襟

石龍夜泊寄尹振民

空江鄰畫舫相望未離岑欲結幽蘭佩其如秋水深身
猶棲嶺海爾已痛人琴若過梅山路滂沱可自禁

擬同昱禪師入羅浮縱觀金沙玉鷺之勝會以
事留省下未果斯約作此奉訊

羅浮古洞天萬仞青龍從欲從白社侶遠叩神仙宮左
挾軒轅叟右呼葛仙翁如何混塵瑤坐令此願空試問
飛錫人何時去山中金沙水碧流丹竈春泥融石竹翠
無恙芳蘭抽幾叢霞舉洵可樂幽陟孰與同悵馬不成

往愴怳心何窮

九日寄故園兄弟

吳天漠漠雁來稀
故國登高意已違
兄弟相思孤棹外
烟波無際一人歸
江花欲暮紅芳歇
林月初生翠羽飛
獨凭危樓凝望久
不知秋露暗沾衣

杪秋坐澹公池上寮同陳元孝梁芝五

晨興理道服清心
屏俗緣擬把琅函書
遠叩曹溪禪崇
蘭有佳憇列坐西池邊
三秋不一雨池水清涓涓
石蕉

凌寒碧海榴終歲
燃日夕各歸去
杖屨爭引船同遊
不
同約邂逅還復然

夾竹桃

灼灼花初吐
青青葉自陰
誰知穠艷質
獨抱歲寒心
絳樹清含吹
朱顏秀出林
繁霜知不及
羨爾托根深

喜旭曙病起

予有憂生戚
中年劇不勝
殊方疎藥物
旅病暱親朋
白髮悲妍節
清時老茂陵
樽前秋色迥
鵬鷄見飛騰

美人蕉

幽居只合在墻陰不與甘蕉共入林
蘸碧最宜雙袖淡施朱不厭十分深
洗粧似欲彈纖指絨恨誰憐卷寸心
試向花前喚名字春情憔悴恐難禁

越臺懷古

荒臺下見海雲低歌舞岡前日向西
一自越王通使後幾回烽火照淞谿

初冬見廨中紅梅盛開有憶

絳雪紛飛已滿枝折來空自攪鄉思只今嶺外花開日
正是江南葉落時

日本佩刀歌

倭奴佩下兩匕首削血吹毛刃無厚摩娑喜似雪色明
揮掣驚同練光走黃金作室玉作環十步一人如等閒
淬刀唯用瀚海水採鐵遠在嵎夷山的歷閃爍難具狀
俠客臨之氣增壯撫刀瞠目一再觀想見荆高千載上

錦瑟

錦瑟無絃冷繡茵玉壺有淚浥香巾
遠書貪展頻彈燭
私語愁聞數避人
秋露暗沈綦履跡
月波空汎畫梁塵
臨窻忽見寒梅白
可惜端憂已到春

題林範漢宮春色畫卷

九重春色在昭陽
穠李夭桃出衆芳
底事劉郎太辛苦
翻然遠覓白雲鄉

胭脂狼籍寫朱顏
石黛縱橫畫遠山
力年來空費盡
不知周昉在人間

頭風初愈腹疾繼作戲題四十字

僕病非今始微疴詎足云頭方責子羽腹久負將軍風
慢驚餘影霜觥惜薄醺寄辭門外轍殘客莫紛紛

寄遠

嶺上折殘梅繁花十月開懷人青桂杓對酒碧江隈寒
至無霜落秋深有雁來不知林下友雲錦幾時裁

奉和筠菴夫子登閱江樓眺望之作

山光水色動飛甍雲海烟靄面面生高峽星河垂斗極

大江潮汐入秋聲
魏牟北闕心長在
庾亮南樓月自明
嘯詠劇知情不淺
玉壺冰魄正淒清

羅浮山中產竹葉
有文如符篆無公
見貽數莖
云貯衣笥中可以辟蛀

窈窈會真峯
亭亭孤竹節
葉上神仙字
文如斷碑碣
聞自稚川留
至今耿不滅
感公遠致此
云可藏衣
纈已媿素為緇
徒慚麻似雪
蟲篆自千年
鶉衣從百結

羅生貽龍川石酒杯

行李淹吾久將遺見子情已成真一酒為致景山銘刻
鏤輸琳碧空明讓水精猶然存太樸還得解新醒

琵琶洲

月明露下白如霜菰葉蕭蕭橘柚黃絕似江南好風景
一灣流水稻花香

採香曲

採香上西阬日落歸前砦天寒歲云晚北風吹衣袂衣
薄猶僂僂歲晚惜盛年不辭攀摘苦但願根株堅提筐

下南浦仰見山桃吐華曜無人知
哀紅落如雨舉手擷柔枝
低頭欲去遲芳氣空盈掬
何由遺所思

軒軒行馬第

軒軒行馬第藹藹凌雲彥
旦陪兔苑游夕侍平臺宴
黼帳錦氍毹琬弓金僕姑
初筵陳醴酒前席躡明珠
春水不久堅朝槿無長妍
一朝失勢去四散如飄烟
沈淵得夜光舐痔叨車乘
誰知金紫門不及蓬蒿徑

謝番禺兄送裘

朔氣集林端山城旅服單南雲愁漫切舊雨重相看遂
有綈袍戀非徒短褐完恩華今日賜脫贈古人難飾豈
三英貴身逾萬石寒絺衣風習習葛屨露溥溥輕煖非
吾好淒其值歲闌堪陪叩竹杖雅稱鹿皮冠歸學嚴陵
隱春江把釣竿

廣州蒲澗寺

廣州城北日初晚菖蒲澗前人獨返蒲葉叢叢野逕香
澗水淙淙化城遠幢節淒涼紺碧零劫灰世代幾回經

巋然冰雪閱千載老松獨抱支離形

曉入海幢寺尋阿字首座不遇

臥覺江風吹鐘聲滌煩慮忽憶東林遊悠然自來去滄
滄日初上冥冥花始曙堂空戶不掩乞食知何處

歲暮酬沈融谷見懷之作

徙倚江樓憶別時瓊枝何自慰相思天涯歲晏猶為客
嶺上花開定有詩斜日孤帆迷遠渡西風一雁下秋池
蠻鄉旅食多憔悴媿爾青雲物外期

江天一望暮烟平
蔓草淒迷抱子城
炎樹霜稀無墜葉
南鴻目斷有懸旌
山花背客年年發
寒月隨潮夜夜明
斷雨殘雲零落久
故人何事獨多情

送覲公入匡廬

迢迢嶺樹隔風烟
已有寒梅發歲前
欲折南枝贈行客
此中真意更誰傳

過崔氏故居

駟馬當時地清濠
對柳隄留賓朱戶啟
卜夜玉繩低亭

館皆新主門楣尚舊題一從歌薤後風物日淒淒

荀令

椒烈呈餘馥蘭幽斂夕芳曾陪荀令坐非直僊仔香

紈扇

春酒憐香蟻秋屏夢彩虹好從紈扇底重與賦秦宮

松桂堂全集卷四十二

欽定四庫全書

松桂堂全集卷四十三

吏部侍郎彭孫通撰

南淮集三

赴惠州別崔大

羈居不知歲
值此蕉萃時
再渡榕溪水
重違故人期
我車方東邁
我心已西悲
寒禽驚夕瀨
木葉感涼颼
年芳暗銷落
誰能長自持

博羅道寄東莞諸故舊

江梅海燕歲將周沙際依然共此遊
零雨不堪頻遠別孤舟何意又南浮
扶留蔓冷寒塘夕諸蔗田荒野水秋
笙鶴不來靈境杳石樓花首自悠悠

白鶴峯

曩昔好遠遊幸此為羈寓勝地撰良辰
名山遂遐慕亭亭波影間杳杳峯陰暮
仙宇已摧頽道人時一遇相向
嗒無言林禽對梳羽昔賢曾買居遺蹟
猶如故雪浪擁

前除松根滴秋雨欲解塵中纓結茅峯頂住恨不起蘇
公從之執巾屨

歲暮牆角緋桃盛開

曉日烘桃萼凌寒獨試花無人憐歲晏空自惜朝華

無題二首

風簾愁對落花裊萬事疎慵過一春玉煖乍拋新刺鞵
香濃不散舊啼巾思深如向燈前出淚盡應緣夢裏頻
準擬相逢親說與綵帆何日渡江津

桂寢秋深翠袖涼重簾委地靜焚香纖寒觸手嫌金剪
遠別驚心怯鈿牀冰萼欸冬櫺眼白晴花拆暖蜜脾黃
尖方臘盡無風雪九月江南夜有霜

惠州除夕立春寄蘧非

蒼輅迎郊日辛盤餞臘辰暖生隄外樹晴颺陌頭塵花
信山桃落風光澗草新禽翻翠羽江吹起青蘋氣候
殊吾土羈棲隔故人五羊遙憶汝萬里各孤身廨舍疎
燈夕琴書旅况貧客愁銷貝葉鄉字斷文鱗歸計滄洲

近交情白首真相期紅藥畔婪尾送殘春

丙午元旦

客中驚早起嶺外又新年旅服辭纈續江城鬧曉煙星
河猶掩藹雲日漸暄妍不道天南路陽春到獨先

合江樓

曉樹青如沐春波漫不流思君無近遠風雨合江樓

閱除目知漢蜚得錦縣有寄

畿邑當新建君年仕正強唯應酌遼水兼欲問南陽鳳

舉丹霄遠花明墨綬香論才多不次努力莫廻翔

正月四日從惠州發舟至廣州途中用東坡新年五首韻示同舟諸子

旅食三更歲春王五紀元舟經羅帶水花暗木棉村烟渚波將暝風林葉自翻停橈須我友濁酒話晨昏

羅浮好洞壑此去路何之瑤草一千歲烟鬟十萬枝欲尋行藥客已過落梅時三歎懷勾漏斯人洵可兒

飛雲峯下邑霧堞捲江清客路逢人日山光遍子城桂

漿留燠在菜甲迸寒生一嚼誇風味何如糝玉羹

挂席平湖外迴帆鱸渚東侵尋時序改憑弔水雲空天
畔青陽節峯頭白鶴翁持杯遙一酌心跡倘相同

水鄉風氣早村墅綠陰繁遙想秦谿曲春光滿故園梅
英堪汎酒蘭茁已當門舊里牆西地依依長竹孫

斤斗水

暮雨猶紛沓寒潮正渺漫斷腸斤斗水春色滿漁竿

朝雲墓

朝雲久已化遺墓復湮沈松竹湖陰外棲禪何處林

端溪石硯歌

端溪之石數十阬一一書家有標格屏風嶺背朝天峯
質亦黝然少潤澤滑不拒墨堅不粗上者無如水岩石
巧匠購之琢為硯價奪琉璃與琥珀百餘年來阬石枯
谿水幽深難往索我遊南越無所須庶幾得此置几席
搜剔山穴心力窮忽然快遇連城璧秀眼泓生鸚鵡青
玉膚斜沁芭蕉白碧泥搓手輒欲圓蒼骨留烟膩無迹

柔毫已自吐仙英
烈麝還能發珠液
山窻客去心手閒
對雨真堪永朝夕
毛生楮生試與俱
一笑相將成吾癖

元夕聞雷

積雨作元夕
輕雷動太虛
微寒臨枕簟
餘潤襲琴書
竹迳人踪合
松窗客夢疎
朝來理春草
新綠滿庭除

春雨堂芍藥歌

荔支不過嶺以北
芍藥不過嶺以南
由來物性有如此
風土遷移豈所堪
春雨堂前十數本
來自揚州舊隋苑

胡家纈子鮑家黃花蕊依然暗香遠因倚東風不自持
偶乘氣暖一紛披託根嶺外非得意逞艷宮中自有時
此花嬌貴世無比壓盡紛紛衆桃李可憐國色與天香
憔悴蠻煙瘴雨裏

禺山

劉鋹當年霸業雄禺山相對起離宮藥洲花塢無蹤跡
只在西風野燒中

宿春雨堂西齋

春夜西齋臥心期得自論白鵬閑對客修竹靜當門書
帙從風亂燈花欲雨繁清觴寒不御徒有酒盈樽

正月小盡日留別退菴兄

肅肅隨陽翼粲粲荆樹枝行斷聲自求花落根不移人
生各有役所苦遠別離春鐙搖繁雨哀響激縈絲淹留
豈不願取別終有時行矣戒舟楫揮手江之湄客行日
以遠客心日以悲客心且莫悲努力勉自持良晤知不
遙深秋以為期

西堂坐清曉竹露青漫漫酒盡未成別微雨增春寒行
者誠風波居者慎眠餐臨行千萬語雜亂初無端情至
不厭煩憂來且自寬念為兄與弟結好逾金蘭各有四
方志寧謀一室歡會當依青雲高飛生羽翰何為空歎
息戚戚摧心肝

曹圻宅觀山谷墨蹟

涪翁墨蹟此第一試向堂中開錦帙伏波祠句擘窠書
似在涪州得意筆精力天矯透紙痕凌蘇轍米寧須論

蒼然筋骨勁于鐵須知成就顏平原曹圻雅士頗好奇
家藏金石不可訾一遭兵燹頃刻盡此卷獨為神護持
清秋置酒徧示客觀者爭誇好風格誰留當日黨人名
千載猶生人愛惜

再寄吳念克

灘江緘遠思書到已春殘訊牒煩高致才人困始安瘴
深嵐氣溼戍苦角聲寒不及衡陽雁因風振羽翰

寄示屠四

青海飄零十載餘
刀環舊約總成虛
閨中何似休相憶
目送歸鴻不寄書

秋蘭引荅廖秀才

南隣廖生頗不俗
贈我蘭苕碧于玉
綺石青泥交錯裁
臨行酬爾秋蘭曲
採之為佩搵入琴
芳澤還堪遺所欽
莫怨靈修唯自惜
不妨長此結同心

南津口寄王默菴

孤村臨渡口斜日下長林
舊侶平原約相思單父琴垂

楊將暮色芳草欲歸心
愁對春江水花前悵別深

泊胥江夜大雷雨

新月川西影漸湮
溼雲千里白鱗鱗
雷聲欲起蛟龍蟄
雨氣能回草木春
戍角吹寒依積水
林光入暝結愁燐
孤舟搖曳空江夕
更借漁簑作比鄰

花朝

好趁松醪熟鄉愁仗一澆
客心驚日月怕說是花朝
入湏陽峽三十里至釣絲灘下

湏江不可泝湏峽多迴洑雲木蔽復虧岡巒起還伏春
雨沒沙尾江風飽帆腹輕舟上前灘杳然烟水綠夜靜
疑有人月明理釣竹

出峽後次始興江上寄陳元孝

景物淒涼感昔遊孤吟况復軫離憂南梁山院春長在
西漢樓船水自流沙石尚含陵谷態雲烟不斷古今愁
始興江上千株樹歲歲花開送客舟

清遠峽口寄陸孝山

三年回首嶺雲孤，計日江春到欲徂。
萬里人歸經暮雨，二禺山盡接平蕪。
方音漸已諳啼駛，客路猶聞喚鷓鴣。
郡閣故人相見近，不禁吟興滿江湖。

滙江口

江流寒峽外，沙岸遠依微。
烟草春無際，雲林路不違。
葉明殘月上，川響夜漁歸。
何事愁淅泊，蕭然客子衣。

觀音巖

峩峩千仞壁，杳杳百尺潭。
石勢忽中圻，安此大士龕。
遠

響激春瀨蒼烟騰遠嵐一燈長寂寂聞見了不忝老僧
久住此白髮紛鬢髮時為乞食出乞已還歸菴微風送
哀梵水石清相含

抵英德縣郭就市買得小英石數枚崑壑皆具
粵山故竒特荒遠每難就誰知一拳石盡此五嶺秀貌
古態愈妍峯多骨彌瘦朝來風雨鳴萬山勢若鬬此石
亦陰冥黝然色非舊時有雨氣生如向雲根漱欲攜出
壑姿一洗塵容陋涵暉與碧落爽氣在襟袖

雨中過白芒村寄高山人儼

春陰生驟寒溪上無人迹
石筍清相羅翠烟紛可摘
欲持三尺絹寫此春山碧
却憶山中人遠在龍池宅
惆悵不同遊白芒風雨夕

韶陽道上寄融谷

數從帆底眺晨星蕩漾孤舟類
水萍夜雨獨行中宿峽
春風重上曲江亭
武溪渺渺寒流白
韶石蒼蒼落照青
得似洞庭張樂處
仙音雖好不同聽

遊丹霞山不果寄澹公

沃洲不可到歎息久離羣
遠水人空返東風草又薰
茶林春雨足竹澗暗泉分
日暮山中客多應詠碧雲

魚梁灘下泊

暗色起何處忽然雲水昏
春燒如新月遠掛山一痕
寒禽呼木杪暗蟲沸草根
遙見暝際火知有林外村
孤舟欲棲泊溜如雲濤奔
羈旅一無託菟結難自論
矯首眺天末躑躅勞心魂

聞雁

千里鄉關落照邊
花時憔悴獨成眠
相江亭上聞歸雁
嶺外飄零又幾年

次曹谿水口遙禮南華山寺憮然有作

逶迤白土村
龍水深且廣
春風吹我舟
搖蕩不能上
其傍有漫流
微波清潏潏
云是昔曹谿
覺路從茲往
我聞能大師
傳衣振遺響
風幡發妙悟
泉石契真賞
說法化毒龍
安心息狂象
當時無上乘
南宗為之長
于今已千

年一燈猶晃朗勝因夙企慕世味苦勞攘酌水未尋源
入林徒託想翠微遙一禮顧已生悽愴逝將攝身心長
往捐塵鞅

洲田

曲折窮岡勢斷斷露石根上瀧春水急將雨野陰繁寒
蛩吟愁思輕舟搖夢魂回看晨發處明滅見孤村

仁化渡口再寄澹公

丹霞渺何許千嶂揀晴空却望雲生處君應在此中

客店寒食

細雨平江溼晚烟
客中寒食倍淒然
津樓落日重回首
腸斷東風燕子前

上巳日飲陸孝山池亭留別

曲磴花間路疎簾竹裏亭
林泉生遠想蘭杜發幽馨
藉艸春將夕流杯晚未停
多情池畔柳終日向人青

游楊歷巖

澄旭滿空山來遊值春暮
寒蟲不知春時見花生樹澤

氣上為雲飛流濺如霧幽興晚未窮僕夫告歸路理策
將來歸立壑緬餘慕後夜憶茲遊悠然夢同趣

南雄別友人

風吹楊柳枝花落東城陌日暮對芳樽歸人轉為客

經張文獻公祠下作

岑岑臺侯嶺荒涼舊相祠衣冠留故里風度想當時西
幸知機早南來遣祭遲難追天寶恨空撫曲江碑杳杳
深山裏颼颼古樹枝棲颼窺宿莽行客拜虛帷溪日迴

仙馭林烟捲翠旂九京如可作千載有餘思

嶺上寄考功兄

來雁亭前雁北飛梅花嶺下折芳菲相思比似凌江水
日夕南流不肯歸

過嶺二首

春風又逐塞鴻飛橫浦人烟入望微却憶天南真似夢
暫來嶺北已如歸松陰不改當時碧柳色曾攀去日衣
猶有平生師友在寸心長自戀音徽

日溯湔江問客程一朝過嶺覺身輕時平已罷三關戍
興盡空為百粵行鳳鳥承旂遊碧落飛廉託乘入朱明
他年倘續羅浮志流寓還堪占姓名

挂角寺寄孝山

一慙松關日半曛遙遙江嶺路中分回頭種玉亭前路
萬疊春山入暮雲

南還至橫浦驛前與程五別處

憶向清秋採白蘋今來江上值殘春一從橫浦三年別

南北俱為萬里人

游南安東山寺觀周量壁間題句

東林禪誦地寂寂對江濱倚檻流清矚當軒合翠筠淒涼花院蹟隔絕鳳池人蘭訊憑誰寄山中欲暮春

新田別客

舊邑頽城在新田落照微片帆將客去雙燕送春歸夜月留空局寒花攬別衣不堪江上路欲去更依依

詠懷十七首

亭亭玉葉梅皎皎如霜白朝為枝上花暮贈隴頭客寧
知相賞辰即為零落夕山花不知名終歲無人摘

緣溪不見人日出東山巔照見秋禾根曉露猶涓涓空
棹引激水自灌原上田雖免人力勞終苦機事牽不如
漢陰叟抱甕以終年

富貴多危機貧賤心不愉客遊常戚戚鄉里無遠圖人
生安所適四顧無一娛東望有仙山山勢鬱以孤三百
七十峯黛色天下無銅乳穴內流螢芝石上敷排雲凌

清海御氣馳蒼梧舉手招霍龍我欲與之俱

猗猗山上桐鬱鬱河邊柳秋至葉自零榮華安得久古
人若無死樂亦非我有矧無久視方百年一反手軒冕
非我榮金石非我壽彈琴而歌風所期在不朽

素律吹暮秋北風淒以怒百卉悴不芳木葉辭林樹蟋
蟀在戶鳴陽禽亦南度萬景不暫待涉迹皆成故昔我
青雲交接軫馳皇路宿艸忽已繁累累丘與墓蜉蝣美
衣裳朝菌不及暮富貴不永年榮華亦何慕

支公好畜馬阮生好蠟屐所好故不同各自成奇癖竝負曠遠名俱有高世迹終勝王安豐時時理籌策

漢苑有佳人顏色麗明霞一旦先朝露委棄泥與沙至今塚上魂化為田中花開時如艷雪幽香世無加花香有時滅紅顏易消歇寧為哉生光勿作團圞月

自昔遭放棄歸臥南山隈日月亦已屢明魄頻相催淑氣布雲物好鳥鳴池臺朝來里社罷元燕翩然迴庭中雜花樹春風五度開而我猶偃蹇淒淒困蒿萊百歲不

可得逝陰難再來且對有數景共傾無算杯誰能慕臭腐鬱結使心哀

少年學干祿振翮思高林上策雖見收世務非所任內顧宦情薄十載猶浮沈濁酒足斟酌枯桐有清音詩書耽夙好良朋多素襟褚小不懷巨綆短難汲深本自安吾拙詎有避世心

客從山中來今晨款我扉手持一書札問君胡不歸山中春未老景物世所稀深翠照檻戶新苗長薺薇松酒

既已熟林筍亦已肥塵情患甚歡勞生思息機誓當從
客去高蹈還初衣

結廬在山曲採藥山之陽宿雲起半嶺溥然滿高岡川
上微雨過靄靄桑榆光心靜理無迂緣順境自忘日暮
旦復去荷鋤歸艸堂

高士不恒有吾陋尚子平踉蹌了婚嫁始為五嶽行人
壽能幾何苦俟黃河清徒令噉名客千載口實生北山
有猿鶴笑爾未忘情

弱齡慕高躅遐舉遺俗塵採芝商山曲種黍桃花津中
道更迷惑轉與世味親羈紲相窘束此志久不伸識閭
物多忤才高禍與隣庶幾木雁間可以處我身

君子戒尚口吉人貴寡辭流連三緘銘反復白圭詩國
武好盡言龜鑑良在茲嗣宗名至慎此理誰能知

春陽何遲遲元景每數數崦嵫日易盡丙夜漏方促立
身在壯年我友敬相勗遲暮空有懷為時苦不足徒捨
若木暉而來就螢燭

晚出南安城還視東山塢紙錢白紛紛多于寒食雨松
柏夾高原饑烏啼墓門肉食厚肌體徒為螻蟻恩金亦
不可成河亦不可塞安得絳雪丹駐此好顏色

南薰長萬物草木俱龍蔥鳥雀樂茂林啁啾鳴好風動
植各自得曠然天地中心空得喪一障盡物我通真契
不在遠妙理良難窮

登贛州城晚眺

寒日下津樓天空夜色浮城收八境盡江帶十川流山

翠濃生雨灘聲冷似秋無能將遠思山月迴含愁

章貢臺

二水城陰合高臺北望頻交綏徵往事握節泣孤臣苦
霧冥冥雨寒蕪寂寂春曾藏周史碧千載結幽燐

西津橋下遲融谷不至

春渚霞生雨乍收鬱孤臺畔遲行舟生憎章貢無情水
相背東西各自流

儲潭

欲叩儲君祠迴舟繫蘭槳凌亂涉清波知是春沙長

大蓼灘阻風

風雨昏林氣江流掩石鱗空山無主者不禁採樵人

下十八灘

石人羅立青磷磷大壺小壺勢漸馴長年最能莫謾語
比來吾已粗知津

張家渡口望青原山

曾聞淨居寺說法雨花繁不識山中路獨尋沙際村巖

光含羣象溪聲息衆喧欲持無上義一一問青原

雨夜泊吉陽城外喜龍臚先帶雲見過

平沙漠漠雨艇子繫江隈忽見瓊枝樹驚從何處來重
闌當夜啟蠟炬背風開知向青原道山中聽講回

樟樹

風散林香落浦沙吹來何處野人家沿溪偶共山僧話
知是江邊樟樹花

度嶺後寄上筠菴夫子

驪曲動城樓波光引棹謳三年南越客萬里北行舟久
習文身俗真為建德游窮經曾問業負笈近從游薄祿
多傾倒深情少報酬別來春冉冉望斷水悠悠鄉夢遶
桑落江舲怨石尤孤村傳杏粥四月下椒丘吳樹帆陰
曉燕雲馬首秋後期知杪歲計日釋離憂百粵通筐篚
千秋奉冕旒日高金闕迴雪暖玉河流遠待朝天使星
霜一畫輶

洪州送人入楚

垂老休官去離居送客情夕陽樊口渡秋艸大堤平宋
玉居猶在宜城酒正清莫嫌妻子累負戴足逃名

重登滕王閣晚眺

兵餘存勝蹟江渚問前遊孤客重經地春風一倚樓殘
星埋劍氣寒雨斷書郵極目長安遠悲來不可留

南浦

南浦吟愁夕凌風獨叩舷流雲連近郭畫棟俯寒烟春
盡江湖上心飛雁鶩邊綠楊如有恨花白已成綿

豫章城下送春有懷故園兄弟

城下烟波暮可哀，扁舟日夕更滌洄。
一春又向他鄉盡，千里曾無尺素來。
野鷺孤飛烟裏沒，江帆相背雨中開。
故園風景今何似，池州汀花夢幾回。

邱龍標納姬于外館巫蠻穉有詩相調余亦和
二絕

霧谷嵯峨臨水清，少年聲迹滿南城。
但教境內無枹鼓，眉撫何妨幹理名。

畫閣名姝絕代無
浦雲山雨對金鋪
偷將內史臨川筆
搦得滕王蛺蝶圖

西江夜發寄陳伯璣

豫章三載夢罇酒
慰平生倚閣聞清詠
臨流悵遠行雲
低津步樹日薄
頗侯城欲叩高人宅
東湖春水平

康郎湖

彭蠡湖頭雨暫停
康郎山下獨揚舲
遠洲一線拖微綠
春岫雙尖送晚青
鏡裏波明生顧兔
畫中舟小點蜻蜓

夜涼忽有漁歌起坐對西風濁酒醒

彭蠡夜泛

清淺宮亭水濺濺百道流殘春風送客終夜月隨舟野
火沈葭葦遙天挂斗牛相依有鷗鷺任意宿汀洲

初夏

孤舟人卧起初夏氣猶清已近餘千渡猶多遠道情捲
簾看落絮欹枕聽殘鶯別意如春雨空江頃刻盈

古意

東風當戶入花絮繞城飛芳草青埋履繁陰綠滿衣採
桑驚戴勝入室感伊威眼見春光盡征人幾日歸

湖中即事

夕泛南湖渚歸程自此分山川餘越地風俗舊番禺
遠墅烟樓草空舟水接雲年來傷物役翻羨白鷗羣

湖中寄涂萬年

杳杳踐修途苔苔陟孤巘沙曠水蕪寒江深春日晚川
路極威紆流芳增繾綣都水接盱江室邇人何遠

饒州東湖

湖光鼓水竹晚憇有清陰不見詩人宅唯餘寶樹林竹
深涼氣進水滿夕陽沈坐聽拏音杳蕭然出世心

寄巫巒樨

一別南州道里賒他時何處寄疏麻蛾眉亭下來相訪
明月滄波是子家

饒州僦一舟甚小夜與蘧非抵足卧

鄱江不易涉去路轉逶迤只合摧眉坐猶堪擁膝歌行

舟如落葉歸思極流波高卧聽邪許傲天已過多

初夏江行

江郭人孤往墟烟水一涯新暄生夏霧初霽失朝霞弱
燕捎花淺迴波點絮斜扁舟曾不繫乘興下汀沙

浴佛日

佛日凌晨起林葵露未晞柘烟江店飯芋雪石城衣貧
覺為農晚愁緣入道稀祇應釋形累長採故山薇

由浮梁抵祁門道中

四月上浮梁溪清水活活漱流就帆陰晞髮迎蘋末
蘭花已抽吳桑葉初捋覽物悟歲時放懷信超越浩然
箕頴心果哉亮難奪

次鮎魚山下

朝日被林邱桑麻蔭道周晨雞鳴桂檝新燕掠萍舟水
市蠶初浴山田麥未秋漸知鄉郡近三載遂刀頭

石鼓村

亂石驚流徹夜聞綠波吹雨細成紋風禽和夢催清曉

水碓無人搗白雲，昌浦近從千澗落。
浙潮遠為一山分，鄉園北望無消息。
煩思誰堪坐似焚。

舟曉

臥覺四維靜杳然，舟已行殘月時一照。
夜氣愴以清，不聞人語響，但聞流水聲。

途次祁山

山勢臨孤邑，江源出舊鄣。
花林霏夕秀，茶臼擣餘香。
流水春陰逝，浮雲世態涼。
青蘿岩屋在，吾意欲褰裳。

水宿

水宿七旬餘迢迢返故廬
粵洲春漲碧秦望夏雲疏
氣入清和後林鳴布穀初
南山十畝地歸去正堪鋤

山樓即事

山閣遲清夕羣喧靜遠空
疏燈峯影裏殘夢雨聲中
失路同羈羽孤生感斷蓬
愁吟寒更劇相荅有哀蟲

魚亭山下有懷詹無幾

婺溪欲溯水潺湲逐客西遊久
未還落日魚梁惆悵絕

不知人在大鰯山

屯溪雨後觀暴漲

暴雨生暄後屯溪竟夕聲谿流三十尺高與石堤平獨
嶼移新麓層波失故清江航成徑路來往踏舟行

發率川下新安江

乘漲下新安香橈擊明鏡深秀樂山情至清表水性亭
亭積翠成草木新暉淨雲林漏微日霞波弄餘映白沙
蕩虛曠素魴恣游泳言踐謝公期遠託休文詠枕流諧

夙諾累心矢終屏

竹節磯

魚亭東下二百里碧沙錦石清相於
漸江脈竭泉眼涸
四十七瀨成溝渠春雨驟至連日夜萬川汨汨爭歸壚
奔濤聒天漚擁樹滴湟湟澎湃增欹歔竹節磯頭水石怒
白浪大如仙人車覆船山下船忽覆桃人土偶皆淪胥
橐中幸無千金裝一琴一帙靡留餘神功冥力獲濟此
微山陰侯吾其魚

吳山陰侯賀齊為清溪水
神廟祀江濱每禱輒應

寄語後人

慎舟楫悔不先戒存衣衾吾家老咸不解事東面招手
從之居生逢

聖世有至幸誰能沈抑同三閭

重過嚴陵

宿雨新波七里流迴沙縵石下瀧舟挂帆客過情空切
釣澤人亡跡自留野鶴江猿同旦暮綠蘅青荔幾春秋
十年出處俱無著媿向山靄問舊遊

東歸至錢塘江館珂月上人遠出見訪相訊間

知家兄當世舍姪元景皆于去年物故驚慟賦

此

江樓相對轉依然不見支公已六年遠出深慚存舊好
早哀知為味枯禪清霜夜判離鴻杳黃土秋埋玉樹妍
何意哀宗頻遭禍鄉音一接淚如泉

江上

夕氣隱寒山長川晦蒼霧日暮暗潮平渺渺西陵渡

五月五日江樓題

五月五日江上宿碧水蒼烟遠相屬吳山澹澹越山青
日倚危樓看不足從作東西南北人山中五泛蒲醪春
主人不歸山寂寞萱草榴花開復落滄江此去託菰蘆
削迹銷聲計不迂學道十年深自悔今朝重媿饋饗徒

江干晚眺

隔江帆隱處知是蕭山路林際青濛濛非烟復非霧

富春村莊即事

新夏江村水拍空枇杷雨間熟梅風魚投釣火夜船上

犬吠行人曉月中

謝村

謝村五月棟風和為送歸人片帆過何事吳音偏入耳
向晨欹枕聽新歌

湖壩早行

蔣葉風凌亂秧田水接連臥聽柔櫓響知是舊吳船

石門

三載淹南土孤蓬復斷萍誰知歸客路已到語兒亭

初從嶺外歸家兄仲謀有喜駿孫歸自嶺南之
作次韻十首

故林芳草想夫君
遯迹長同鹿豕羣
採藥空山偕綺季
逃禪小果謝聲聞
獨醒不厭杯中物
相憶時停嶺外雲
今日重逢還一慰
海榴花發夏初分

去住三年總未知
開顏重此話離思
牀前夜雨悲同叔
塘上春芳感客兒
親舊幾人猶健在
存亡一訊轉成疑
南窻梧竹淒如晦
灑淚看題見憶詩

浪說三山近十洲擔簦千里漫成遊旅顏不醉蠻鄉酒
征棹頻移蟹子舟有幸長鯨初投首無情滄海尚橫流
敝車即次傷淹滯飛矢危城幾汰輶

柳絮梅英感物華縈愁觸緒浩無涯空林綠遍丈無艸
寒雨吹殘夜合花雲葉暗沈經歲札烟蘿深鎖故人家
連波歸計蹉跎久憔悴風情薄似紗

夢繞山中桂樹堂行人何事久炎荒薄遊三見花成雪
長物惟餘簞似霜海賈歸時天若畝椰漿熟後醉為鄉

侵尋江嶺無消息松菊凋殘柳半黃

太史空登辨物臺二東杼柚正堪哀
西成已見書螟螣冬實何須詫李梅
乍喜絲綸傳六郡微聞災沴譴三台
關心桑梓多私計恩澤何時日下來

城外邊聲咽暮笳西風颯颯暗飛沙
中流結蜃雲為屋片席驚鳬浪作花
遠水雙星分使檝寒濤八月斷浮槎
傷心京觀何年築謫戍東南早及瓜

海曲諸田正有人十年烽火劇黃巾
受降別有王侯賞

並育深知覆載仁客盡非龍謾沈尹地多真虎懾裴旻
逐臣萬里情無賴躑躅江潭夢

玉宸

琴樽聊此共晨昏晝掩荆扉鳥雀喧覆雨交情宜廣絕
奕棋世事莫深論西風短笛山陽里秋艸寒烟上蔡門
何似埋名躬抱耒一鋤春雨杏花村

羈人心事近如何峽樹川雲寄慨多行轍似曾窮地軸
客槎疑是溯天河江妃感夢乘烟至水府朝真曳珮過

欲叩璇宮徵異蹟翠旗光裏擊雷鼉



松桂堂全集卷四十三